

Ina runda da casa per las Sursilvanas

La dumengia vargada ha il campinadi d'unihoc cuntinuau suenter ina pausa dad in meins e miez muort il coronavirus. Las damas dils Desertina Bulls han astgau giugar quella ga a casa el Center Fontauna. Tuttas selegravan d'astgar mussar agl agen publicum co ellas dattan unihoc.

Igl εμπrem giug han ils Desertina Bulls dau encunter Schaffusa. La devisa era clara, quei giug sto l'equipa da casa gudignar. Las Sursilvanas han teniu ault il tempo e mess spert sut squetsch igl adversari. Aschia sa *Gada Cathomas* sittar igl εμπrem gol pils Bulls suenter in sbagl en la defensiva dallas adversarias. Ella 5avla minuta sietta *Noemi Zanin* il 2:0 sin pass da Gada Cathomas. La finamira era da metter las adversarias vinavon sut squetsch ed alzar il resultat avon pausa. Quei ha denton buca funcziunau. Tschun secundas avon la fin vegn Schaffusa da marcar il pari 2:2. Suenter pausa ein las Sursilvanas puspei pli concentradas ella defensiva e laian neginas caschuns allas adversarias. E sch'ina balla anflava la via tras la ferma defensiva tegn il goli dils Desertina Bulls, *Livia Cadruvi*, quels siets senza problems. Cun bunas cumbinaziuns vegnan ils Bulls adina puspei tier fetg bunas caschuns dad ir en avantatg. La balla leva denton buca ir en gol. Ella 32avla minuta survegn *Corina Venzin* in pass da Gada Cathomas, cugliuna l'entira defensiva da Schaffusa e porta l'equipa sursilvana en avantatg cun in bi siet egl anghel. Uss ei il nuv sesligiaus, ils fans portan la giuvna equipa da Mustér en in regl. Ella 34avla minuta sietta *Noemi Zanin* siu secund gol dil di. Mo duas minutas pli tard vegn Gada Cathomas da sittar in bi siet ch'il goli lai rebatter. *Anica Seiler* reagescha il pli spert e vegn da smacar la balla sur la lingia. Aschia ha l'equipa romontscha gudignau igl εμπrem giug claramain cun 5:2.

...ed encunter Wängi

Cul proxim adversari oriund da Wängi havevan ils Bulls aunc aviert in quen, damai ch'ellas havevan spiars gliez giug ella prerunda cun 0:3. Avon ina grondiusa culissa e massa fans dils Desertina Bulls eran las damas motivadas sco aunc mai. Ellas entscheivan il giug sco ils pumpiers. *Aline Cajacob* cugliuna l'entira defensiun da Wängi, dat in bi pass avon gol nua che *Anica Seiler* spetga exact el dretg liug e sa sittar suenter igl 1:0 per las Sursilvanas suenter diesch secundas. Ella 5avla minuta sietta Gada Cathomas il 2:0 sin pass da *Corina Venzin*. Il giug vegn pli aggressiv e las adversarias vegnan tier ina ni l'otra caschun da sittar igl εμπrem gol. *Ursina Venzin*, en gol tiels Bulls, parescha denton tut quei che vegn sin siu gol. Suenter pausa aulzan las Sursilvanas aunc ina ga il tempo. Ella 27avla minuta dat *Ramona Venzin* in bellezza pass sur gl'entir plaz ora sin *Annalea Candinas* che trapla il goli da Wängi cun in siet tras las combas. 3:0 pils Desertina Bulls ed ils aspectaturs ein fascinai dallas giuvnas sursilvanas. Cuort suenter dat Wängi la risposta e sietta igl 1:3. Ei vegn aunc ina gada interessant. Ins senta la tensiun el Center Fontauna. En gol dils Bulls ha ei aunc dau ina midada per che tut ils golis hagian la caschun da mussar lur potenzial avon igl agen publicum. E quella caschun ha *Mila Demont* nezegiau. Cun miraculusas paradas tegn ellas las indigenas el giug. Treis minutas avon la fin decida *Alexandra Flepp* il giug cun in ferm siet egl anghel. Desertina Bulls 4:2 encunter UHC Wängi.

UHC Desertina Bulls cun Alexandra Flepp, Aline Cajacob, Anica Seiler, Annalea Candinas, Aurelia Giger, Aviva Mazzetta, Chanel Monn, Corina Venzin, Estella Mazzetta, Fabiana Bearth, Gada Cathomas, Ilu Demont, Jana Caduff, Livia Cadruvi, Mila Demont, Milena Derungs, Noah Giger, Noemi Zanin, Ramona Venzin, Tamara Derungs, Ursina Venzin, Silvan Giger.

Per ils Desertina Bulls:

Silvan Giger